

DIE ZÜNFTIGE 1992
RYNACHER FASNACHT 2023

E Robispielplatz isch e tolli Idee,
aber Rynach het jetzt leider keine meh.
Dr Gmeindroot het uns welle vor Usgoobe bewaare
und het s Volk überzüggt an de Kinder z spaare.

Lut UNICEF-Lable isch jo Rynach,
kinderfründlig und au vylfach.
Doch s Volk het gnueg vom allgemeine Gäldverschwände
und duet sich leider tragisch vom Kind abwände.

Jetzt fählt e Robispielplatz – und zwar e glatte
wo me ka Hütte baue - Latte an Latte.
Das duet uns allne ganz schuurig weh,
mir hätte nit gspart, sondern das Gäld uss geh.

S Volk an dr Urne het aber gseit «Nei»,
zum Spiele löhn mir drum d Kinder dähei.
Dört könne sy besser – obwohl umstritte –
d Freizyt em Handy, Tablet oder PC wittme.

Die Junge wüsse wie me Sache im Internet ka bstelle,
aber sy könne nit baschtle, das het me schyynbar so welle!
Kreativ hämmere, naagle oder moole,
das isch nüt für unseri verwöhnte Goofe.

Unseri Lösig wär simpel und au eifach,
praggtisch und dienti absolut der Sach.
D Kinder könnte, statt im Internet versaue,
eifach no e paar protzigi Kreisel baue.

Z Däärwyl hänn sy e Robi, dr Platz isch ryychlich,
au in Aesch bi Gott gits ein – es isch sooo pynlich!
Nur d Rynacher, oder ämmel doch die Meischte,
hän sich kei neue Robispielplatz welle leischte.

E neue Robi duet sich für d Gmeind nit rentiere,
deby könnt me doch super kombiniere.
Es hät e chli Muet brucht, aber wenn me hätti welle,
hätt me d Kinder s neue Surbaum Schuelhuus lo erstelle!

Es hätt sich sicher niemerts drgege gweert,
hätte die Kinder doch e huffe gleert.
Dass me mit de Händ ka öppis schaffe,
statt dr ganz Daag nur in Bildschirm z gaffe.

Im Ischlag hät me dr Robi könne plaziere
und vom Altersheim gmietlig übere spaziere.
Dört hätte die Alte die Junge könne instruiere,
wie me e Hütte könnti konstruiere.

Mir hänn dänkt mir könne das jetzt noch hoole
und hän Kindergarte Kinder dr Waage lo moole.
Mit Stolz dien mir das Kunschtwärk presentiere
und hoffe dermit jungi Fasnächtler z motiviere.

Denn ohni Spielplatz wo me ka mit em Hammer ummehaue,
empfääle mir doch jedes Joor e Fasnachtswaage z baue!